

Wednesday, September 3, 2025

Time - 2:30pm - 2:35pm

AKASHVANI AIZAWL
REGIONAL NEWS UNIT

BHARAT DARSHAN TOUR

Larsap General (Rtd) Vijay Kumar Singh chuan vawiin khan Ministry of Home Affairs hmalakna hnuaia Border Security Force ruahman, Bharat Darshan Tour hmanga Delhi kal tur zirlai naupang 100, zirtirtu 8 leh tour guide-te chu Raj Bhavan atangin a vai liam.

Larsap chuan Tour a hlawhtlin theih nana MHA, BSF leh buaipui dangte hmalakna fakawm a tih thu a sawi a. India ram chu ram zau tak, hnam ziarang, tawng bakah mi hrang hrang awmna ni mahse, ram inpumkhat leh inlungual tak anni tih sawiin Bharat Darshan Tour-a kal tur zirlaite chu zirlaibu a chuang chiah lo thil tam tak an zir tel dawn avangin uluk taka ngaihvena thil thar zir chhuah tum tlat tur leh, Mizoram tana hmasawn thil tha engemaw tal rawn hawn theuh tum turin a chah a. Zawnha leh hriat duh an neihte inthlahrung hauh lova zawt zel tur leh hun tha an neih chu bawhpelh lova, hmasawn nana hman tuma theihtawp chhuah turin a chah a ni.

Byte of Governor

Tun tum Bharat Darshan Tour atan hian District pali- Aizawl, Lunglei, Mamit leh Saitual District-a School 8 a zirlai 100 leh zirtirtu 8 te thlan chhuah an ni a. Ni 6 chhung September ni 3 atang ni 8 thleng awh tur niin, Delhi-a hmunhma pawimawh tak takte, hmun hlui pawimawhte leh Sawrkar pisa bakah Museum an tlawh a, India ram chanchin, hmunhma pawimawh, hmasawna, khawtlang leh hnam ziarang hrang hrangte leh Sawrkar inrelbawlnate Bharat Darshan Tour kaltlang hian zirtir tum an ni.



PM VISIT

Prime Minister Narendra Modi in karleh inrinni-a Mizoram a rawn tlawh turah inbuatsaihna chak taka kalpui niin vawiin khan Sawrkar department hrang hrang thil pawimawh sawiin an thukhawm.

Thutkhawmah hian venhimna hrang hrang bakah Prime Minister in hun a hmanna tur Lammuala venhimna kenkawh dan tur leh mipui punkhawmna hmuna felfai taka ruahmanna a kal theih nan thil pawimawh hrang hrang sawiho a ni a,

Security pass nei te chauh luh phah an nih dawn bakah uluk taka venhimna kalpui a ni dawn a ni.

Thutkhawma tarlan danin Sairang Railway Station pawh Railway thuneituten engkim peih fel tumin chak takin hma an la a, Union Minister of Railways leh Information & Broadcasting changtu Ashwini Vaishnaw chu a hma ni chiah September ni 12 ah alo thlen dawn thu tarlan a ni bawk.

ICT Secretary leh Census Operations Director Amit Sharma chuan Sairang Railway engkim peih fel tumin chak takin hma lak ani a ti a, Mizoram chuan thawhna leh lirthei hmangin hmun dang a pawh theih hnuah rel an hmang tangkai thei tur chu a lawmpui thu a sawi bawk.



MNF NAMES DAMPA BYPOLL CANDIDATE

Mizo National Front chuan vawiin khan Dampa Bial MLA by-election lo awm tura an party candidate turin Dr R. Lalthangliana an ruat thu an puang.

MNF President Pu Zoramthanga chuan vawiin khan Party chhung inkhawmah Dampa Bial by-election a an candidate tur chu Sr Vice President Dr R. Lalthangliana a nih thu a puang a, Dr R. Lalthangliana hi MLA inthlan hnuhnung ber khan South Tuipui Bialah hian MNF ticket-in a ding a, ZPM Candidate Pu Jeje Lalpekhlua a hneh zo lo a ni.

Dampa bialtu MLA Pu Lalrintluanga Sailo hi July ni 21 khan a thi a, by-election neih a ngaih avangin inbuatsaihna kalpui chhoh tan niin hmalakna kawng hrang hrangah neih a ni a, Election Commission of India in Dampa bial by-election neih hun tur hi a puang thuai tura rin a ni.

Hetihlai hian ZPM Party chuan August ni 25 khan an party candidate tur atan Pu Vanlalsailova an ruat thu an sawi tawh a, Mizoram Pradesh Congress Committee chuan candidate tur an ngaihtuah mek tih sawiin Mizoram BJP pawhin candidate an neih ngei tur thu an sawi bawk.



HEALTH MINISTER

Health Minister Pi Lalrinpuii chuan vawiin khan MINECO Khatla atangin NHM hnuai NAS enkawl, Sawrkar damdawiin-a dah tur 102 Ambulance Motor 8-te chu a vailiam.

He hunah hian Minister chuan mipuite mamawh Ambulance thar an nei thei ta chu lawmawm a tih thu sawiin National Ambulance Service chu NHM hnuai programme pakhat, 2013 atanga kalpui tan a nih thu leh Raipuar (Nau neitur) ten thianghlim leh hrisel taka sorkar damdawiin a nau an neih theih te, nausen damlo te damdawiin lama kal lam leh haw lam phur kual zung zung thei tur a Ambulance ruahman te, damlo enkawl hmanhmawh ngai te damdawiina phurh nghal zung zung theihte chu a thil tum ber a ni tih a sawi a. Tun dinhmunah National Ambulance Service, NHM hnuai, Ambulance motor 62 awmin district hrang hranga sorkar damdawiin 59 ah te dah an nih thu leh chungte chu NHM hnuai Call Centre (102) atanga darkar 24 chhung enkawl an ni a ti bawk.

National Rural Health Mission hi kum 2005 ah India ram ah kalpui tan niin, Mizoram ah pawh hemi kum vek hian kalpui ve nghal a ni a. NRHM Programme hi kum 2013 ah National Health Mission tih a thlak niin National Health Mission Programme hnuaiah chuan, thingtlang bakah khawpui (Urban) lam a mipui chengte pawh a huam ta a. NHM hnuaiah hian Committee hrang hrang State Health Mission, State Health Society, Mission Director leh State Programme Management Support Unit-te an awm a ni.



MZP ASSEMBLY

Mizo Zirlai Pawl (MZP Assembly) vawi 69-na chu vawiin hian Vanapa Hall ah hman a ni dawn a, hetah hian kum 2025 atanga kum 2027 inkara MZP hruaitu thlanna neih a ni ang.

MZP thuchhuah tarlan danin General Headquarters Election 2025 Nomination thehluh hun hi August ni 20 thleng hawn a ni a, President, Vice President, General Secretary, Asst General Secretary, Treasurer, Finance Secretary post pakhat theuh hi candidate 2 zelin an inchuh dawn a ni.



CYMA LEGAL AWARENESS CAMPAIGN

Nizan khan Central YMA leh Mizoram State Legal Services Authority te chuan Aizawl khawpui chhunga Branch YMA hruaitute tan Dan hriatna kawnga inzirtirna an buatsaih.

He hunah hian Mizoram State Legal Service Authority Member Secretary Pu Vincent Lalrokima chuan YMA hruaitute chu khawtlang thianghlimna atana tha thawhtu leh tangkai ber berte an nih avangin Dan hriatna a tul thu a sawi a. YMA hruaitute tana hriattur pawimawh hrang hrang - ruihhlo man kawnga dan anga man dan tur te, witness chungchang te, POCSO chungchangte leh thil pawimawh dangte sawiin hemi zawhah hian zawhna leh chhanna hun hman a ni a, kalkhawm ten zawhna chi hrang hrang zawtin MSLSA hruaitute hian an chhang a ni.

CYMA President Pu Lalhmachhuana chuan Dan inzirtirna Booklet “ Finchhuahtu” tih Central YMA hnuaia Legal Sub- Committee leh MSLSA te buatsaih chu a tlangzarh a. YMA hruaitute tana Dan chungchang zirtirna Booklet siam a nih leh Programme siam a nih chungchangah MSLSA te thahnemngaihna lawmawm a tih thu a sawi a, YMA in tha thlah lova ruihhlo hluar zel a do dan a tarlang bawk. YMA hruaitute leh memberte chu Dan hnuaia fim taka ruihhlo do leh khawtlang siamthatna kawnga hma la zel tur lin a chah a, thil sual titute dan anga hrem an nih theihna turin dan kan hriat ve a ngaih thu a sawi bawk.

